

四庫全書

史部

雲騎尉

雲騎尉

雲騎尉
雲騎尉
雲騎尉
雲騎尉

雲騎尉

恩騎尉

謹案秦漢二十級之爵漢武功爵魏名號侯以

下諸爵與九等異制今擇其以侯稱者附於侯

表之下其不以侯稱者無所附麗則不入表漢
魏之關內侯亭侯及縣鄉等侯名為侯而位在
子男下則改從附列唯晉以後之縣侯在伯子
男上故別著之唐勳官在輕車都尉上者有上
柱國柱國上護軍護軍在騎都尉下者有驍騎
尉飛騎尉在雲騎尉下者有武騎尉皆今制所
無故不著恩騎尉為

聖朝特設列古所未著謹缺其沿革而仍繫於表

以誌令典焉

世爵世職

國朝定制

世爵世職之等有九曰公曰侯曰伯曰子視一品曰男
視二品曰輕車都尉視三品曰騎都尉視四品曰雲騎
尉視五品曰恩騎尉視七品自公至輕車都尉又各有

三等

授爵自雲騎尉始雲騎尉襲一次加一雲騎尉則
合為騎都尉襲二次再加為騎都尉兼一雲騎尉

襲三次再加為三等輕車都尉襲四次二等輕車都尉

襲五次一等輕車都尉襲六次一等輕車都尉兼一雲

騎尉襲七次三等男襲八次二等男襲九次一等男襲
十次一等男兼一雲騎尉襲十一次三等子襲十二次

二等子襲十三次一等子襲十四次一等子兼一雲騎尉襲十五次三等伯襲十六次二等伯襲十七次一等伯襲十八次一等伯兼一雲騎尉襲十九次三等侯襲二十次二等侯襲二十一次一等侯襲二十二次一等侯兼一雲騎尉襲二十三次三等公襲二十四次二等公襲二十五次一等公襲二十六次內有因陣亡給與者襲次已完仍授恩騎尉令其世襲

公侯伯子男輕車都尉騎都尉雲騎尉恩騎尉之爵以褒叙勲績酬庸懋賞次第其功績之大小而錫以世襲之等

國初定世爵自公至拖沙喇哈番共八等凡授爵自

拖沙喇哈番始如拖沙喇哈番加一拖沙喇哈番則
合為一拜他喇布勒哈番再加則為拜他喇布勒
哈番兼一拖沙喇哈番再加為三等阿達哈哈番
遞加至一等阿達哈哈番如再加一拖沙喇哈番
則為一等阿達哈哈番兼一拖沙喇哈番再加則
為三等阿思哈尼哈番積拖沙喇哈番二十有六
則為一等公開創功臣策勲錫爵與河山共永封
爵在順治七年九年

恩詔以前者世襲罔替或論功在

詔後立功在

詔前者亦世襲罔替其給予

勅書注明世次者仍按次承襲自後凡有忠誠宣力懋建

軍功膺授功爵者除奉

特旨世襲罔替外其餘自拖沙喇哈番襲一次遞加至

一等公襲二十六次至一等公以上爵無可加今

以適子襲一等公以別子襲其餘爵康熙元年定

凡世爵合并至公侯伯者其子弟承襲時照原繫
幾人之爵仍與幾人分襲雍正元年定一二三等

公各錫以美名

如襲績公
忠達公等

其外戚則做古恩澤侯

義命為承恩公乾隆元年總理王大臣奏定精奇
尼哈番以下世爵清文並改用漢文精奇尼哈番
為一二三等子阿思哈尼哈番為一二三等男阿
達哈哈番為一二三等輕車都尉拜他喇布勒哈
番為騎都尉拖沙喇哈番為雲騎尉其清文從舊

十四年定一二三等侯伯亦各錫以美名

如奉義侯敦惠

伯等

自後膺封爵者凡勲猷殊等皆奉

特旨定錫嘉號十五年定自一等公襲二十六次至雲

騎尉襲一次均按所開襲次載入

誥勅又定陣亡人等子孫襲次已完者賞七品京官令

其世襲罔替十六年世襲七品官定為恩騎尉與

國初所定共為世爵九等

歷代建置

謹案公侯伯子男之爵昉於唐虞仍於三代其
間惟殷爵三等餘皆五等並分土建國傳之久
遠封建一定世次不復差別其外則周有司勳
賞地之法蓋如畿內卿大夫世食采邑之比大
小各有差等而世次遠近亦無定制也秦去五
等制爵二十級以賞戰功以徹侯擬公侯以關
內侯擬圻內子男其餘以擬卿大夫士蓋髣髴
其意云爾漢仍而用之制爵大者王小者侯侯

即秦之徹侯也二十級終漢代不廢復有武功
爵之十一級則武帝一時之制也魏別置名號
侯以下諸級復置國王公侯伯子男鄉亭關內
侯諸列蓋五等之目至是復存晉宋以後有開
國爵散爵之分有封郡封縣之別因時殊制以
迄於元明行之不改然其言九等十二等者皆以
親王郡王及諸爵並列而數之考王爵為寵錫
親王之鉅典與酬賞功勲之制不同雖漢初功

臣亦有分王唐代卿士功高者得以至於郡王
要不得以為常制故篇中備採舊史原文而王
爵則概不列之於表至輕車都尉以下古所未
見唐置勳官始改隋之開府儀同三司為上下
輕車都尉儀同三司為騎都尉帥都督為雲騎
尉次列於勳官十二轉之中是為酬勳之始而
宋以後因之其在古者雖漢有輕車將軍騎都
尉之職隋有八尉之目祇可溯其稱名之始而

非以為沿革也恩騎尉則我

皇上創制殊典以優卹功臣尤為前古勲官所未備
焉考自古勲爵判為兩途不相連屬爵有世襲
而勲無世襲爵之世襲者並無世次之殊其有
功臣受功而兼得他勲者亦不過虛崇美號而
已夫爵所以酬勲也勲官亦所以酬勲也何容
歧視而別置之且周家五等而下卿大夫士皆
謂之爵其次等皆由遞積而上可詳考也惟我

聖朝恩施優渥品秩章明授爵自雲騎尉始積二十六等而為一等公其一等侯伯子男輕車都尉之兼一雲騎尉者襲次亦因以遞加勲爵既合為一世襲之遠近一視其功績之大小其陣亡授爵襲次已完者復制恩騎尉以優卹於無窮茂典隆恩均非前代所可企及茲以歷代規制不同之故撮叙大端於此以便考証並以見我

朝世爵定制實為超軼於千古焉

三代

杜佑通典昔黃帝旁行天下分建萬國至於唐虞
別為五等曰公侯伯子男則虞書所謂輯五瑞備
五玉是其制也夏與唐虞同殷制公侯百里伯七
十里子男五十里

禮記王制王者之制祿爵公侯伯子男凡五等

鄭康

成注按元命苞云公者為言平也公平正直侯者
候也侯王順逆伯之為言白也明白於德也子者

奉恩宣德男者任功立業此五等者
為虞夏及周制殷則三等公侯伯也
公侯田方百

里伯七十里子男五十里
鄭康成注此北殷所因
夏爵三等之制也武王

初定天下更立五等之爵增以子男而猶因殷之
地周公攝政斥大九州之界公侯大者地方五百
里其次侯四百里伯三百里子二百里男百里孔
穎達疏案尚書武成云列爵維五分土維三既云
列爵維五故知
增以子男也

謹案鄭注孔疏皆以殷爵三等至周而仍為五
等惟杜佑以殷制地三等其爵亦有五等為說
少異當以注疏為正

秦

通典秦制爵二十等以賞功勞二十徹侯十九關
內侯十八大世長十七駟車庶長十六大上造十
五少上造十四右更十三中更十二左更十一右
庶長十左庶長九五大夫八公乘七公大夫六官
大夫五大夫四不更三簪褭二上造一公士

後漢書百官志劉昭注劉劭爵制曰商君為政備
其法品為十八級合關內侯列侯凡二十等關內

侯者依古圻内子男之義也秦都山西以關内為
王畿故曰關内侯也列侯者依古列國諸侯之義
也

謹案鄭樵通志曰秦爵二十等最高徹侯乃得
食縣其次關内侯食租稅于關内餘十八等大
庶長以下則如吏職馬端臨文獻通考說亦相
同大旨悉本之劉劭蓋其時爵與階不分故共
為二十等今則徹侯關内侯當屬於爵而十八

級當屬於階以其文不可割裂分屬且十八級者本以賞戰功亦令輕車都尉等官所緣起故與文武官階篇並錄斯文俾互見焉

漢

史記漢興以來諸侯年表漢興序二等

裴駰集解
劉昭曰漢

封功臣大者王小者侯也司馬貞索隱
應劭曰雖名為王其實如古之諸侯

高祖末年

非劉氏而王者若無功上所不置而侯者天下共誅之

前漢書百官公卿表爵一級曰公士二上造三簪裹
四不更五大夫六官大夫七公大夫八公乘九五
大夫十左庶長十一右庶長十二左更十三中更
十四右更十五少上造十六大上造十七駟車庶
長十八大庶長十九關內侯二十徹侯皆秦制以
賞功勞徹侯金印紫綬避武帝諱改曰通侯或曰
列侯

謹案漢爵皆沿秦制故此文與秦互見而文武

官階篇中互見亦同

通志漢有國王國侯亭侯三等

王皆裂地侯以戶數為差分民自此

始漢初論功封侯者凡百四十三人
食邑者除租每戶一歲更輸錢二百

史記平準書請置賞官命曰武功爵

裴駰集解
曰茂陵中書

有武功爵一級曰造士二級曰關興衛三級曰良士四級曰元戎士五級曰官首六級曰秉鐸七級曰千夫八級曰樂卿九級曰執戎十級曰左庶長十一級曰軍衛此武帝所制以寵軍功焉

諸

買武功爵官首者試補吏先除千夫如五大夫其有

罪入減二等爵得至樂卿以顯軍功軍功多用

越等大者封侯卿大夫小者郎吏吏道雜而多端
則官職耗廢

謹案漢興不設五等其封爵以王侯概之復仍
秦二十等之制以賞功勞鄭樵所謂三等之亭
侯蓋即列侯中之小者耳其實仍二等也初制
分土廣大旋以致亂其後稍復易置諸侯王得
推恩分封其子弟衆建少力而國勢以安亦可
知立制之未善矣至武帝立武功爵以寵軍功

而買爵得至樂卿尤為一時權設之計宜其行之未久而即罷也漢又有國大夫列大夫上聞爵見史記樊噲列傳如淳注以為國大夫即官大夫列大夫即公大夫上聞爵則始於魏文侯勝齊天子賞文侯以上聞又有執帛執珪之爵見曹參灌嬰列傳注以為孤卿執帛侯伯執珪以朝位比之呂氏春秋有得伍員位執珪之文蓋皆雜採古制而用之者以其非常制故不盡

著而附識於此

後漢書百官志列侯所食縣為侯國本注曰承秦
爵二十等為徹侯金印紫綬以賞有功功大者食
縣小者食鄉亭得臣其所食吏民後避武帝諱為
列侯武帝元朔二年令諸王得推恩分衆子土國
家為封亦為列侯舊列侯奉朝請在長安者位次
三公中興以來唯以功德賜位特進者次車騎將
軍賜位朝廷侯次五校尉賜位侍祠侯次大夫關

內侯承秦賜爵十九等為關內侯無土寄食所在縣民租多少各有戶數為限

通志後漢爵亦三等

皇子封王其郡為國其列侯雖節寇元勳不過四縣

三國

三國魏志武帝紀建安二十年始置名號侯至五

大夫與舊列侯關內侯凡六等以賞軍功

裴松之注魏書

曰置名號侯爵十八級關中侯爵十七級皆金印紫綬又置關內外侯十六級銅印龜鈕墨綬五大夫十五級銅印環鈕亦墨綬皆不食租與舊列侯關內侯凡六等臣松之以為今之虛封蓋自此始

通典魏黃初三年初制封王之庶子為鄉公嗣王
庶子為鄉侯公之庶子為亭伯其後定制凡國王
公侯伯子男六等次縣侯次鄉侯次亭侯次關內
侯又置名號侯爵十八級關中侯爵十七級關外
侯爵十六級五大夫十五級自關內侯皆不食租
虛封自魏始

謹案五等之制漢代不備至三國而復立而縣
鄉亭侯關內侯復多為之等以變通之蓋因漢

大小列侯而漸分其制也裴松之謂虛封自魏
始蓋指名號侯至五大夫諸爵而言杜佑則以
關內侯以下皆不食租考名號侯以下有關中
侯關內外侯之稱與關內侯相近其所以別為
新置者正以關內侯食封其餘不食封以是為
殊耳是杜佑之言為未核也自秦置爵二十級
而漢因之兩漢書所記之賜爵皆秦舊制也魏
則別置諸爵合而稽之多至六十餘級故魏制

所載每有行賞則必賜爵始之以為賞功終之
以為賜與誠未合於慎重之義矣

晉

晉書職官志武帝咸寧三年有司奏從諸王公更
制戶邑皆中尉領兵大國次國小國皆制所近縣
益滿萬戶又為郡公制度如小國王亦中尉領兵
郡侯如不滿五千戶王置一軍一千一百人亦中
尉領之南宮王承隨五萬各於秦始中封為縣王

邑千戶至是改正縣王增戶為三千戶制度如郡侯亦置一軍自此非皇子不得為王而諸王之支庶皆皇家之近屬至親亦各以上推恩受封其大國次國始封王之支子為公承封王之支子為侯繼承封王之支子為伯小國五千戶以上始封王之支子為子不滿五千戶始封王之支子及始封公侯之支子皆為男非此皆不得封

通志晉有王公侯伯子男又有開國郡公縣公郡

縣侯伯子男及鄉亭關內等侯凡十五等

王大國二萬戶

三軍兵五千次國一萬戶二軍兵三千下國五千戶一軍兵一千五百其公之制如五千戶國侯如不滿五千戶國並置一軍千人其伯子男以下各有差不置軍

宋齊梁陳

宋書百官志宋氏以來一用晉制惟王國大小國皆有三軍晉江左以來公國無中尉常侍侯國無大農侍郎伯子男唯典書以下無學官令吏職皆以次損省焉

通志宋時因晉制惟大小國皆三軍齊因之梁因
前代

隋書百官志梁制五等諸公位視三公班次之開
國諸侯位視孤卿重號將軍班次之開國諸伯位
視九卿班次之開國諸子位視二千石班次之開
國諸男位視比二千石班次之

通典梁封爵亦如晉宋之制

隋書百官志陳承梁制其封爵為九等之差郡王

第一品嗣王藩王開國郡縣公第二品開國郡縣
侯第三品開國郡縣伯第四品開國子第五品開
國男第六品湯沐食侯第七品鄉亭侯第八品關
中關外侯第九品

通志陳有郡王嗣王藩王開國郡公開國縣公侯
伯子男沐食侯鄉亭侯關中關外侯凡十二等

謹案陳封爵自郡王以下隋書以為九等通志
以為十二等蓋通志分王為三開國公為二隋

書則王公各一等也考自漢制非劉氏不王列
代仍之其自魏晉以迄陳隋諸王爵之制皆為
親藩分土而設於酬勲之典無與唯開國公以
下則皆計功而授爵然亦各開府食邑建置僚
屬又或分土治民為事權所屬與列爵賞功之
制亦不相符合以其為爵級所在故並摭錄其
概備考核焉

後魏

魏書官氏志皇始元年始建曹省封拜五等天賜
元年九月減五等之爵始分為四曰王公侯子除
伯男二號皇子及異姓元功上勲者封王宗室及
始藩王皆降為公諸公降為侯侯子亦以此為差
於是封王者十人公者二十二人侯者七十九人
子者一百三人王封大郡公封小郡侯封大縣子
封小縣王第一品公第二品侯第三品子第四品

本志舊制諸以勲賜官爵者子孫世襲軍號
太和十六年改降五等始革之止襲爵而已世宗

頒行職令王開國郡公

第一品

散公

從第一品

開國縣侯

第二品

散侯

從二品

開國縣伯

第三品

散伯

從第三品

開國縣

子

第四品

散子

從第四品

開國縣男

第五品

散男

從第五品

北齊

隋書百官志後齊官制王第一品開國郡公從第

一品散郡公開國縣公第二品散縣公開國縣侯

從第二品散縣侯開國縣伯第三品散縣伯從第

三品開國縣子第四品散縣子從第四品開國縣

男第五品開國鄉男散縣男從第五品

後周

隋書百官志周制外命諸公九命諸侯八命諸伯七命諸子六命諸男五命

通典後周制封爵郡縣有公侯伯子男者皆加開國授柱國大將軍開府儀同者並加使持節大都督

謹案舊唐書言勲官之始出於周齊交戰之際

本以酬戰士其後漸及朝流階爵之外更為節級今考周齊爵制史書不詳即其載於舊唐書者亦止云周置上開府儀同三司開府儀同三司上儀同三司儀同三司而已其所謂十一號亦未盡載其目也隋書言隋採周制置上柱國十一等以酬勤勞則周之十一號亦當不甚相遠史文闕軼無以察其緣起自魏晉以至後周亦畧識其梗概而已

隋

隋書百官志國王郡王國公郡公縣公侯伯子男
凡九等煬帝時並廢唯留王公侯三等

通典開皇中樊子蓋進爵封為濟公言其公濟天
下特為立名無此郡國

隋書百官志高祖採後周之制置上柱國柱國上
大將軍上開府儀同三司開府儀同三司上儀同
三司儀同三司大都督帥都督都督總十一等以

酬勤勞六年又別置武騎屯騎驍騎游騎飛騎旅
騎雲騎羽騎八尉其品則正六品以下從九品以
上上階為郎下階為尉煬帝罷

通典武騎尉屯騎尉驍騎尉游騎尉飛騎尉旅騎
尉雲騎尉羽騎尉建節尉奮武尉宣惠尉綏德尉
懷仁尉守義尉奉誠尉立信尉都十六尉並隋置
以為武散官

謹案隋代開府儀同三司為唐代輕車都尉之

所從起至雲騎尉則始見於隋書八尉之中當時蓋特以為官階及武散官而已未嘗有勳爵之名也然唯未立勳爵則階散即所以酬勳故考隋代爵制自九等而下必及於十一階與十六尉也

唐

唐書百官志司封郎中掌封命朝會賜予之級凡爵九等一曰王食邑萬戶正一品二曰嗣王郡王

食邑五千戶從一品三曰國公食邑三千戶從一品四曰開國郡公食邑二千戶正二品五曰開國縣公食邑千五百戶從三品六曰開國縣侯食邑千戶從三品七曰開國縣伯食邑七百戶正四品上八曰開國縣子食邑五百戶正五品上九曰開國縣男食邑三百戶從五品上

通典異姓卿士功業特盛者亦封郡王

自至德元年

三年封異姓為王者凡百一十三人九等並無官土其加實封者則

食其封分食諸郡以租調給

自武德至天寶實封者百餘人自至德二

年至大曆三年實封者二百六十五家

謹案唐爵九等功臣亦多至郡王者然爵土皆係虛名所給實封俱於內府支給繒布又多及身而止不復著承襲之典其制與前代異馬端臨通考云唐初如英衛之類其子尚襲封至中葉以後則此制盡廢如狄仁傑封梁公子元嗣未嘗襲梁公張說封燕公子均未嘗襲燕公也

今考唐書元宗本紀開元五年詔予公侯子孫承襲褚無量列傳無量請收叙唐初功臣世絕者雖在支庶亦得承襲元宗允其請始與襲封是則開元中偶有襲封而肅代後則絕無其制也又云唐會要神龍二年七月制功臣段志元等二十五家所食實封並依舊給可見當時實封止受封者之身如此二十五家則特旨支給非通例也夫酬庸錫爵位至王公乃及身而止

其子孫曾不得仰沾恩澤此唐制疎畧不得優厚勲庸之義厥後強藩列鎮反得私竊土地而世守之亦輕重倒置積漸使然也

唐書百官志司勳郎中掌官吏勲級凡十有二轉為上柱國視正二品十有一轉為柱國視從二品十轉為上護軍視正三品九轉為護軍視從三品八轉為上輕車都尉視正四品七轉為輕車都尉視從四品六轉為上騎都尉視正五品五轉為騎

都尉視從五品四轉為驍騎尉視正六品三轉為飛騎尉視從六品二轉為雲騎尉視正七品一轉為武騎尉視從七品凡以功授者覆實然後奏擬戰功則計殺獲之數堅城苦戰功第一者三轉出少擊多曰上陣兵數相當曰中陣出多擊少曰下陣矢石未交陷堅突衆敵因而敗者曰跳盪殺獲十之四曰上獲十之二者中獲十之一曰下獲凡酬功之等見任前資常選曰上資文武散官衛官

勲官五品以上曰次資五品以上子孫上柱國柱
國子勲官六品以下曰下資白丁衛士曰無資跳
盪人上資加二級次資下資無資以次降凡上陣
上獲五轉中獲四轉下獲三轉第二第三等遞降
焉中陣之上獲眡上陣之中獲中獲眡上陣之下
獲下獲兩轉下陣之上獲眡中陣之中獲中獲眡
中陣之下獲下獲一轉破蠻獠上陣上獲比兩番
降二轉凡勲官九百人無職任者番上於兵部眡

遠近為十二番以強幹者為番頭留宿衛者為番
月上外州分五番主城門倉庫執刀上柱國以下
番上四年驍騎尉以下番上五年簡於兵部授散
官不第者五品以上復番上四年六品以下五年
簡如初再不中者十二年則番上六年八年則番
上四年勲至上柱國有餘則授周以上親無者賜
物太常音聲人得五品以上勲非征討功不除簿
諸州授勲人歲第勲之高下三月一報戶部有蠲

免必驗

謹案唐始列勲官為十二轉之法以差序功績而定其品數蓋周禮司勲之遺意也其戰功有上陣中陣下陣之殊其叙資有上資中資下資無資之別而番上輪簡規制亦為詳備但十二轉至上柱國而止而九等之爵不歸積筭則以爵與勲分為二途不相聯攝其實唐爵但係虛名並無分土而勲官之制則除授益輕至其末

路遂不復存優崇之意舊唐書言咸亨後戰士
授勲動盈萬計身應役使有類僮僕據令乃與
公卿齊班以為由其猥多出自兵卒之故此固
未季批政非立法之本意然當時之濫予無次
亦可概見矣

舊唐書職官志唐初改上開府儀同三司為上輕
車都尉開府儀同三司為輕車都尉儀同三司為
騎都尉上大都督為驍騎尉大都督為飛騎尉帥

都督為雲騎尉都督為武騎尉○勲官者出於周
齊交戰之際本以酬戰士其後漸及朝流階爵之
外更為節級周置上開府儀同三司開府儀同三
司上儀同三司儀同三司等十一號隋文帝因周
之舊更增損之武德初雜用隋制至七年頒令定
為上柱國柱國上大將軍大將軍上輕車都尉輕
車都尉上騎都尉騎都尉驍騎尉飛騎尉雲騎尉
武騎尉凡十二等起正二品至從七品貞觀十一

年改上大將軍為上護軍大將軍為護軍自外不改

通典漢文帝元年始用宋昌為衛將軍位亞三司
後漢章帝建初三年使車騎將軍馬防同三司同
三司之名自此始魏黃權以車騎將軍開府儀同
三司開府之名自此始齊開府儀同三司如公梁
開府儀同三司位次三公後魏亦有之北齊有開
府儀同三司及儀同三司後周改為開府儀同大

將軍儀同大將軍仍增置上開府儀同大將軍上
儀同大將軍隋文帝並以為散官唐改上開府儀
同三司為上輕車都尉開府儀同三司為輕車都
尉儀同三司為騎都尉

謹案開府儀同三司列代以為散官隋唐以為
文散官與勲賞不相合而武德七年所制上輕
車都尉騎都尉實由此而改其沿革之由不可
沒也唯其與勲爵秩殊制故權差叙唐書及通

典之文於此以著勲官之概而不復列之於表
通典輕車將軍漢武帝置以公孫賀為之又
有輕車校尉梁陳後魏北齊亦有輕車將軍
唐採舊名置上輕車都尉輕車都尉騎都尉
漢武帝置以李陵為之更始初亦有晉以後
歷代皆有之唐採舊名置上騎都尉騎都尉

謹案漢以來輕車校尉輕車將軍及騎都尉
乃將輕車及騎士之官皆以實職供事不為
繫銜

唐省其職而採其名以為勲官之等蓋所從者
開府儀同三司之秩而所採者輕車校尉等官
之名故並列於此以資考覽

通典驍騎尉飛騎尉雲騎尉武騎尉並隋置為文

散官

按當作武散
官通典誤

唐採置自上柱國以下並為勲

官

謹案隋置八尉後加為十六尉皆為武散官唐
採其四以為勲官其雲騎尉則即今制之所由

昫也考雲騎尉隋以前所無有而八尉之由設
實始於漢武帝之八校武帝置中壘屯騎步兵
越騎長水胡騎射聲虎賁等八校尉後漢則為
五校皆掌宿衛兵魏晉以下五校之名與後漢
同惟後魏五校各置二十人此實隋八尉之所
由始也唐雲騎尉之秩因帥都督而改而其名
則因隋之八尉故追溯其沿襲之由來者如此
至唐勳官之上柱國柱國上護軍護軍驍騎尉

飛騎尉武騎尉令皆不設而恩騎尉則出於
聖朝創制之特典逾格殊恩非後唐以來之所有故
無從考証焉

五季

文獻通考封爵之差唐制王食邑五千戶郡王國
公三千戶開國郡公二千戶縣公千五百戶縣侯
千戶伯七百戶子五百戶男三百戶又有食實封
者給纁帛每賜爵遞加一級唐末及五代始有特

加邑戶而罷實封之給又去縣公之名封侯以郡
宋史職官志五代以來初叙勲官即授柱國

謹案五代封爵之制不詳於史惟親王之封代
必有之今據文獻通考所載則列爵九等與唐
不異惟去縣公而以郡侯代之且罷實封之給
耳又據叙勲即授柱國之文則知勲官十二等
非復唐代之制也

宋

宋史職官志司封郎中掌官封叙贈承襲之事列

爵凡等曰王曰郡王曰國公曰郡公曰縣公曰侯

曰伯曰子曰男

分國三等大國二十七次
國二十小國二百二十

謹案宋史職官志又云爵一十二王嗣王郡王

國公郡公開國公開國郡公開國縣公開國侯

開國伯開國子開國男所載與此文少異蓋其

先定制而中葉則漸有變更也

宋史職官志司勳郎中參掌勳賞之事凡勳級十

有二曰上柱國正二品曰柱國從二品曰上護軍
正三品曰護軍從三品曰上輕車都尉正四品曰
輕車都尉從四品曰上騎都尉正五品曰騎都尉
從五品曰驍騎尉正六品曰飛騎尉從六品曰雲
騎尉正七品曰武騎尉從七品率三歲一遷必因
其除授以加之凡賞有格若事應賞從其所隸之
司考實以報則必審核其狀以格覆之謂之有法
酬賞非格所載參酌輕重擬定以上尚書省謂之

無法酬賞若功賞未酬而賞格改易者輕從舊格
重從新格

文獻通考政和中罷勲官淳熙末朝議欲復之以
旌有功如貼職之比後亦不果行惟安南閣婆占
城三國王始封加上柱國南丹州刺史加武騎尉
馬

文獻通考宋又採秦制賜民爵曰公士

端拱元年
賜諸州高

年一百二十七人爵公士景德中福建民有擒獲
強盜者當授鎮將以遠俗非所樂並賜公士自後

率為

例

岳珂愧郗錄階散勲官前世合於一至唐則析而為二階勲功臣檢校唐析於四而宋則合於一隋置上柱國至都督總十一等以酬勤勞置六品以下散官八郎為正階八尉為從階柱國等號本以酬勞武騎諸稱並同郎位至唐一歸之於勲官則階散也勲官也唐雖因隋而所用未嘗因隋是謂前世合於一而唐則析為二唐之有功者或叙階

或賜勲或加以檢校或寵以名號而又申之以封
爵重之以實封宋制每一遇郊官至某則加功臣
若干字酬勲若干級進階若干等徹國若干戶並
舉而與之故世但以為煩而不見其用是謂唐析
於四而宋則合於一所以神宗獨斷而盡去之也
謹案勲官與授爵本不相同唯其分職遞轉為
制有相近者故著其稱名之始唐代設此蓋祇
以為階散之互用至宋而遇郊錫賁進級紛紜

不以為酬功之等而以為濫賞之資其為失又殊甚矣岳珂所載頗盡階勲分合之曲折而宋代濫賞之失亦可概見故節錄其文於此以資考証焉

遼

王世貞藝苑卮言遼之封爵惟有國王郡王國公三等郡名率以漆水柳城混作蘭陵亦如宋高密建安之類國名則屢進屢改有加至二國者其初

宗室與勲戚無異道宗太康五年詔惟王子封一

字王餘並削降

遼之外戚多以功封非盡由恩澤也

王圻續文獻通考勲級遼無考

金

金史百官志封爵正從一品曰郡王曰國公正從

二品曰郡公正從三品曰郡侯正從四品曰郡伯

舊曰縣伯咸安二年更

正五品曰縣子從五品曰縣男凡勲

級正二品曰上柱國從二品曰柱國正三品曰上

護軍從三品曰護軍正四品曰上輕車都尉從四
品曰輕車都尉正五品曰上騎都尉從五品曰騎
都尉正六品曰驍騎尉從六品曰飛騎尉正七品
曰雲騎尉從七品曰武騎尉

元

續文獻通考元制王正一品郡王從一品國公正
二品郡公從二品國侯正三品郡侯從三品國伯
正四品郡伯從四品縣子正五品縣男從五品上

柱國正一品柱國從一品上護軍正二品護軍從
二品上輕車都尉正三品輕車都尉從三品上騎
都尉正四品騎都尉從四品驍騎尉正五品飛騎
尉從五品雲騎尉正六品武騎尉從六品

明

明史職官志凡爵非社稷軍功不得封封號非特
旨不得與或世或不世皆給誥券

續文獻通考太祖下江左因勝國之舊為五等爵

以贈勲臣及文武之死綏者其後有王公侯伯之
典而罷子男洪武十七年奏定有封爵者給誥皆
如一品之制惟公侯用玉軸伯子男犀軸

明史職官志稽勲掌勲級凡文勲十

正一品左右
柱國從一品

柱國正二品正治上卿從二品正治卿正三品資
治尹從三品資治少尹正四品贊治尹從四品贊
治少尹正五品修正庶尹從五品協正庶尹
自五品以上歷再考乃授

勲○武選掌功賞之事凡武官六品其勲十有二

正一品左右柱國從一品柱國正二品上護軍從
二品護軍正三品上輕車都尉從三品輕車都尉

正四品上騎都尉從四品騎都尉正五品驍騎尉
從五品飛騎尉正六品雲騎尉從六品武騎尉

謹案明初為五等之爵後有王公侯伯而無子
男既而仍設五等皆給誥券世襲凡襲封則徵
其誥券稽其功過覈其宗支以第其世流降除
之等吏部驗封司掌之此明代五等之制也至
勲級則有文勲武勲之別考武勲盡從前代而
文勲則別為柱國卿尹之號核其要歸亦猶文
散武散之義而已茲以列代沿襲之故並列於

篇以考見異同之制焉謹案世爵之制莫大於
定功閥之大小以為世襲之久近前代惟五等
則有承襲其以軍功賜爵者類不及其子孫甚
至唐封功臣爵至郡王亦皆及身而止其子孫
無聞焉至如列代之開國公侯亦祇美其名稱
功非佐命亦從給予非實如周禮之分王功曰
勲國功曰功也漢家賜爵紛紜東西京無代無
之有普天下均賜一級者其間復令民得買爵

而軍功之賞大者公侯卿大夫小者郎吏吏道
雜而官職耗廢宋每遇郊祀錫賞勲爵無數以
酬功之鉅典而僭濫用之殊不甚惜其敝甚矣
其端皆由於爵制未定或多為之節級以備賞
賜或虛設其勲階以示褒寵而總無與于循名
核實之義也我

朝自開國功臣世襲罔替其後有忠勤著績軍功
異等者咸授以二十六等之爵列爵之等級即

為世襲之等級無有及身授爵而子若孫不得襲封者至於叙次軍功則以現任官職之大小計其立功之參等而分別除授戰功則有功牌之五等攻城則有難易之六等水戰則有奪舟之三等陣亡授爵則自雲騎尉至輕車都尉兼一雲騎尉有差皆計功覈實澤及子孫無或有虛錫之爵公侯伯既褒以美名其有勲績懋著復特承

諭旨既得世襲罔替其已得世襲之爵又以軍功得封合為一爵者一等男以下按次承襲至一

等男以上則均為世襲罔替

皇上復優念陣亡之後襲次已畢復錫恩騎尉以傳之永久班爵既定較如畫一而

隆恩所逮有加無已以視前代襲爵不分大小勲官徒為虛設者品制之詳明德澤之宏遠誠不可以道里計矣

欽定歷代職官表卷六十五

欽定四庫全書

史部

欽定歷代職官表卷六十六

檢討_臣翁樹培覆勘

纂修兼校勘候選知縣_臣范 澐

謄錄監生_臣張廷琛

欽定四庫全書

欽定歷代職官表卷六十六

聖賢後裔世職併衍聖公官屬表

公	聖	衍
漢	後漢	三國晉
宋	陳	北魏
北齊	後周	隋
唐	季	宋
遼	金	元
明		

翰林院五經博士 世襲太常寺博士

子思書
翰林院
五經博士
院山長

世襲太常寺博士

世襲子監學錄 世襲子監學正

此山溪
知二書
院山長
院學錄

學正
學錄

四氏教學授學錄聖廟執事官

國學教
授學正
學錄

廟學教
授學正
學錄

學錄

三氏教
授司教
學錄
四氏學
授學正
學錄

[illegible]

[illegible]

掌	書	書	寫	奏	差
---	---	---	---	---	---

欽定歷代職官表

422

5

—

—

素

隨朝伴官

隨朝伴官

衍聖公世封聖賢後裔世職并孔林各官

國朝官制

衍聖公

世襲正一品

掌奉至聖孔子闕里廟祀順治元年題准封爵一如前朝階正一品班列尚書上二年改

賜三臺銀印十三年依例授光祿大夫十六年依例給清漢文三臺銀印乾隆十四年改給清漢篆文一品三臺銀印有大慶曲衍聖公並蒙

錫蔭初公階正一品而蔭子則仍依正二品康熙六十年始視正一品廕一子五品官著為例

聖賢後裔翰林院五經博士二十六人

正八品
俱世襲

孔氏北宗一人掌奉中庸書院祀南宗一人掌奉

衢州孔子廟祀元聖周公復聖顏子宗聖曾子亞

聖孟子先賢仲子閔子冉子伯牛冉子仲弓端木

子言子卜子顓孫子有子周子明道程子伊川程

子張子邵子後裔各一人朱子後裔二人先儒韓

子後裔一人關氏後裔三人各掌奉其先世之祀
孔氏北宗以衍聖公次子承襲餘並以嫡子襲孔
氏顏氏曾氏孟氏東野氏仲氏閔氏冉氏端木氏
卜氏言氏顓孫氏有氏博士十五人屬於衍聖公
餘各就其家除授有闕則督撫核明應襲之人咨
部題請承襲

聖裔太常寺博士一人

正七品
世襲

掌奉聖澤書院祀以衍聖公第三子承襲

聖裔國子監學錄二人

正八品

一奉尼山書院祀一奉洙泗書院祀並由衍聖公

於族內選用

聖裔國子監學正一人

正八品世襲

掌奉儀封聖廟祀順治八年衍聖公奏准世襲如故

聖裔世襲六品官一人

掌分獻崇聖祠

國初仍前代曲阜用孔氏世職知縣乾隆六年山東
巡撫白鐘山言曲阜知縣向由衍聖公保舉選用
每多瞻徇請在外揀選調補不必拘用孔氏奉
旨允行以現任世職知縣授為世襲六品官遇有缺出
揀選調補悉照執事官之例

四氏學教授一人

正七品

學錄一人

正八品

教授掌訓課孔顏曾孟四氏生徒以學錄文行兼
優歷俸六年者陞補學錄掌副教授訓迪生徒而

教公之子弟於孔氏歲貢廩生捐貢及廩生內選
用初教授學錄止由衍聖公保舉咨部除授乾隆
二十六年山東布政使奏定令衍聖公將揀選應
補人員移送撫臣驗看送部具題

聖廟執事官四十人

三品二人 四品四人 五品六人
七品八人 八品十人 九品十人

掌凡祭祀分獻及爵帛香祝之執事雍正四年

特旨增設各按品級給章服著衍聖公於孔氏子孫內選
擇人品端方威儀嫻雅者報部充補每年各給俸

祿銀二十兩或曾經出仕而退休在籍或身有職銜而未曾出仕以及貢監生童等皆可入選

司樂一人奎文閣典籍一人屯田管勾一人

並正七品

林廟

守衛司百戶一人

秩視衛守備

知印一人掌書一人書寫一

人奏差一人隨朝伴官六人

並正七品

司樂掌樂章樂器而教肄樂生典籍掌奎文閣書籍及禮生管勾掌祀田錢穀之出入祭祀則供其牲牷筮盛治膳羞醢醢之屬其屬有屯官八員鉅

野郟城平陽各二人東阿獨山二屯各一人分掌
五屯以供祀事百戶掌陵廟之戶籍供其灑掃戶
役之事主守禮器祭祀則司滌濯掌犧牲之宰割
自司樂以下分職治事凡四司知印掌書書寫掌
公府文書信印奏差掌齋衍聖公表箋章奏隨朝
伴官掌隨從衍聖公朝覲辦事初無常員遇朝覲
輒咨部給銜乾隆十五年始額定六員以上官皆
由衍聖公保舉咨部補授

歷代建置

漢

山東通志孔子九世孫騰漢高帝過魯封為奉嗣

君一云奉聖君

謹案奉嗣闕里文獻考作奉祀疑此有傳訛

闕里文獻考孔氏世嫡自漢高帝過魯封九世孫騰為奉祀君始創推恩之例

漢書孔光列傳元帝即位徵孔霸以師賜爵闕內侯食邑八百戶號褒成君霸上書求奉孔子祀元

帝下詔曰其令師褒成君闕內侯霸以所食邑八百戶祀孔子焉

荀悅漢紀元始元年封周公後公孫相如為褒魯侯孔子後孔均為褒成侯追謚孔子為褒成宣尼公

漢書平帝本紀元始元年封孔子後孔均為褒成侯奉其祀

漢書恩澤侯表褒成侯均以褒成烈侯霸曾孫奉

孔子後侯

謹案孔騰奉祀之封不見於史通典叙聖裔封爵始於孔霸然霸自以帝師蒙恩非由先聖得封如前此尚有夢侯聚矣至元始褒成之侯是為尊崇先聖後裔世爵之始

袁宏後漢紀建武五年封孔子後孔安為殷紹嘉公十三年殷紹嘉公為宋公周承休公為衛公十四年夏四月辛巳封孔子後孔志為褒成侯

後漢書光武帝本紀建武十四年封孔子後志為褒成侯

後漢書儒林列傳世祖封均子志為褒成侯志卒後子損嗣永元四年徙為褒亭侯世世相傳至獻帝初國絕

洪适隸釋後漢魯相乙瑛置孔子廟卒史碑司徒臣雄司空臣戒稽首言魯前相瑛言詔書崇聖道勉六藝孔子作春秋制孝經演易繫辭經緯天地

幽贊神明故特立廟褒成侯四時來祠事已即去
廟有禮罷無常人掌領請置百石卒史一人典主
守廟春秋饗禮則出王家錢給犬酒直臣愚以為
如瑛言可許制曰可永興元年魯相平行長史事
卞守長擅言詔書為孔廟百石卒史一人掌主禮
罷選年卅以上經通一藝雜試能奉宏先聖之禮
為宗所歸者謹案文書守文學掾魯孔龢師孔憲
戶曹吏孔覽等雜試龢修春秋嚴氏經通高第事

親至孝能奉先聖之禮為宗所歸除猷補名

謹案後漢書儒林傳永元四年褒成侯損徙封
褒亭侯然魯相乙瑛立卒史碑韓勅造孔子廟
禮器碑史晨祠孔子廟碑皆稱褒成之封瑛碑
立於永興元年勅碑立於永壽二年晨碑立於
建寧二年皆在永元之後是損未嘗徙封傳之
誤爾

三國

三國魏志文帝本紀黃初二年詔以議郎孔羨為宗聖侯邑百戶奉孔子祀令魯郡修起舊廟置百戶吏卒以守衛之

隸釋魏魯孔子廟碑黃初元年大魏受命以魯郡百戶命孔子二十一世議郎孔羨為宗聖侯令魯郡修起舊廟置百戶吏卒以守衛之釋云魏志黃初二年正月詔以議郎孔羨為宗聖侯奉孔子祀令魯郡修起舊廟置吏卒守衛碑云元年而

作二年誤也後漢書孔僖傳注以羨為崇聖侯亦誤也

謹案黃初宗聖之封史以為二年碑以為元年或據碑謂史誤非也文帝受禪在建安二十五年十一月越二月即為二年碑因孔羨之封追本受禪之事而言之爾至百石吏卒即漢之百石卒吏史作百戶則其誤無疑但漢卒史乃吏名而魏志及碑皆作吏卒則有不可曉者

晉

晉書武帝本紀泰始三年徙宗聖侯孔震為奉聖
亭侯太元十一年秋八月庚午封孔靖之為奉聖
亭侯奉宣尼祀

宋齊梁陳

宋書禮志奉聖亭侯孔亭五世孫繼之替慢不祀
宋文帝元嘉八年有司奏奪爵至十九年又授孔
隱之兄子熙先謀逆又失爵二十八年更以孔惠

雲為奉聖侯後有重疾失爵孝武大明二年又以
孔邁為奉聖侯

宋書文帝本紀元嘉十九年詔奉聖之嗣速議繼
襲魯郡民孔景等五戶居近孔子墓側蠲其課役
供給灑掃

謹案漢始置孔氏守廟百石卒史至宋時但給
灑掃戶則百石卒史意晉時亦不復置矣明始
以灑掃戶有才德者充林廟守衛百戶則灑掃

戶雖非官而歷代相承實林廟守衛司百戶所
由始故附載其事以著緣起而表則不列其後
來所設之灑掃戶亦不瑣載焉

南史梁敬帝本紀太平二年詔求魯國孔氏族為
奉聖侯

南史陳廢帝本紀光大元年以儀同三司兼從事
中郎孔英慈為奉聖亭侯奉孔子祀

北魏

北史魏孝文帝本紀延興三年詔以孔子二十八世孫魯郡孔乘為崇聖大夫給十戶以供灑掃太和十九年幸魯城親祠孔子廟詔拜孔氏四人顏氏二人為官又詔選孔氏子孫一人封崇聖侯邑百戶以奉孔子祀

謹案文獻通考後魏封孔子二十七葉孫乘為崇聖大夫孝文太和十九年改封二十八葉孫珍為崇聖侯與北史孝文紀以孔乘為二十八

世孫互異又考太和十九年詔拜顏氏二人為
官是為褒錄顏氏之始

北齊

北史齊文宣帝本紀天保元年詔改封崇聖侯孔
長為恭聖侯邑一百戶以奉孔子祀

馬端臨文獻通考北齊改封三十一代孫為恭聖
侯

後周

北史周宣帝本紀大象二年詔進封孔子為鄒國公邑數準舊立後承襲

隋

文獻通考隋文帝仍舊封孔子後為鄒國公煬帝改封為紹聖侯

唐
隋書煬帝本紀大業四年詔立孔子後為紹聖侯

唐書禮樂志高祖武德九年封孔子之後為褒聖

侯

杜佑通典唐貞觀十一年封孔子裔德倫為褒聖侯神龍初授褒聖侯崇階朝散大夫仍許子孫傳襲

新唐書禮志武后天授元年封孔子為隆道公神龍元年以鄒魯百戶為隆道公采邑以奉歲祀子孫世襲褒德侯

舊唐書元宗本紀開元二十七年追贈孔宣父為

文宣王褒聖侯改封文宣公

闕里文獻考三十五代孫璿之唐元宗開元二十
七年詔諡孔子曰文宣王以其嗣為文宣公任長
吏代代勿絕三十六代萱襲封文宣公兼兗州泗
水令三十七代齊卿唐德宗建中三年襲封文宣
公兼兗州功曹三十八代惟脤憲宗元和十三年
襲封文宣公授兗州叅軍三十九代策明經及第
授曲阜縣尉襲封文宣公四十一代昭儉襲封文

宣公兼曲阜令

劉肅大唐新語自漢魏以來歷代皆封孔子後為
褒成侯或號褒聖侯至開元二十七年詔冊孔子
為文宣王其嗣褒成侯改封文宣公令右丞相裴
耀卿攝太尉持節就國子監冊命訖有司奠祭樂
用宮懸八佾之舞詔曰宏我王化在乎儒術皆發
揮此道啟迪含靈則生人以來未有如夫子也所
謂自天攸縱將聖多能德配乾坤身揭日月故能

致天下之太平成天下之大經美政教移風俗君
君臣臣父父子子人至于今受其賜不其猗歟文
多不盡載

山東通志四十一代昭儉襲封文宣公累宰曲阜
子光嗣哀帝天祐二年授泗水令林廟主

謹案呂兆祥陋巷志載唐德宗貞元六年南郊
赦書節文授四十一代孫願五品正員官文宗
以四十三代孫覽為殿中侍御史宏式為同州

參軍皆推恩聖裔特加叙錄非官制之常今不
盡錄

五季

山東通志光嗣為灑掃戶孔未所害未自為曲阜
令光嗣子仁玉育於外家長訴於朝乃誅末後唐
時以仁玉襲封文宣公

闕里文獻考孔氏子孫為曲阜縣令昉於唐咸通
間續至後唐始以文宣公兼之四十三代仁玉孔

未之亂生甫九月匿於外家後唐明宗長興元年
魯人訴於朝乃誅未以公主孔子祀授曲阜主簿
三年遷龔邱令封文宣公晉高祖天福五年改曲阜
令後周太祖廣順二年詔以曲阜令兼監察御史
呂兆祥陋巷志後周太祖廣順二年駕幸曲阜詔
顏子之後以四十六代孫涉授曲阜縣主簿

謹案此事雖於官制無關然歷代率以世爵崇
孔氏而褒錄諸賢後裔者明以前不數見故亦

存之以著緣起

宋

文獻通考太祖乾德四年以文宣王四十四代陵
廟主進士孔宣為兗州曲阜縣主簿太宗太平興
國三年孔宣可授太子贊善大夫襲封文宣公天
禧元年以文宣王四十六代孫光祿寺丞聖佑襲
封文宣公

宋史祖無擇列傳至和二年上言開元謚孔子為

文宣王以其後為文宣公以祖之美諡而加後嗣
不經甚矣乞明詔有司詳求古制別定美號於是
下近臣議改為衍聖公

宋史哲宗本紀元祐元年改封孔子後為奉聖公
不預他職

謹案聖裔封號前代更易不一而衍聖公之號
始於宋至和二年至元祐又改為奉聖旋又復
舊自是以後相承不改焉

闕里文獻考元張頌廟學記孔子舊宅因廟建學
昉於魏之黃初其間興廢不常有宋大中祥符三
年殿中丞公自牧奏就廟側創學帝曰講學道藝
貴近廟庭當許於齋廳內說書乾興元年孫宣公
守兗州於廟建學請以楊光輔為講書奉禮郎始
賜學田元祐四年尹復泰以文潞公薦為教授給
田二十頃以贍生員選任教導其重如此要必以
講六經之道傳聖人心法為職而小學之教節目

織悉宜有分任其事者考之碑刻則學正錄皆孔氏子孫為之蓋當時乃教授自署毋亦選擇而使以寓激勸與抑因其親愛俾帥幼而入學者與

山東通志宗真宗大中祥符二年就廟建學以訓孔氏子孫哲宗元祐元年置教授一員於舉到文官內差或委本路監司保舉有行義人充令教訓本家子弟尹復泰以文潞公薦為教授本年又置學錄一員

謹案此條所載教授學錄緣起較張頌記為詳
故互見以備考

闕里文獻考明劉健重修三氏學記闕里三氏學
建於宣聖廟之東南以教孔顏孟三氏子孫廟之
建其來遠矣學則自宋大中祥符間始考厥初止
以教孔氏子孫其後益以顏孟二氏蓋自元祐間
始

山東通志宋真宗改曲阜為仙源縣仁宗皇祐三

年詔自今仙源縣官復於孔氏子弟中選用徽宗
崇寧間又詔文宣王後常聽一人注兗州仙源縣
官有丞有簿有尉大抵皆世職也○孟子四十五
代孫寧宋仁宗景祐四年孔道輔薦於朝授鄒縣
主簿奉孟子祀

謹案此為褒錄孟氏之始又闕里文獻考載宋
真宗天禧五年詔於夫子後選差朝官一人監
督孔氏廟後時道輔以知仙源縣充徽宗崇寧

二年詔文宣王冢選親族一人判司簿尉事即以家長承襲元代由省臣擇孔氏中廉幹者一人委充提領監修官依族長授八品冠帶蓋沿其制明初猶以翰林檢閱官孔涇為族長其後衍聖公自擇族人為之始無品秩其提領監修官明初改為提領林廟事亦無品秩

國朝則族長沿舊名而提領林廟事改稱林廟舉事亦均無品秩且既設聖廟執事官即以執事

官兼此二事不復專設故今不載於表中而於
叙置之初附載其源流如此

遼未置

謹案遼史不載孔氏世爵亦無先賢之裔蒙襲
錄者蓋聖裔聚族於山東而諸賢之裔亦皆居
宋地故也

金

金史熙宗本紀天眷三年以孔氏四十九代孫瑤

襲封衍聖公

闕里文獻考金廟學教授章宗明昌元年勅於四
舉五舉終場進士出身人內選博學經史衆所推
服者充秩正八品○元張顓廟學記金氏因之廩
賜教育有加無替○金熙宗皇統間仍改仙源為
曲阜章宗承安二年勅衍聖公年及十七許兼曲阜
令不許別行差占○金亮懷英重修至聖文宣
王廟碑有層閣以備庋書詔以奎文名之

謹案此為奎文閣賜名之始至元乃設官以典之

王圻續通考章宗明昌三年四月詔曰衍聖公秩視四品階正八品不稱可超遷中議大夫永著於令

元

元史太宗本紀五年詔以孔子五十一世孫孔元措襲封衍聖公

元史孔思晦列傳孔氏族人相與議思晦嫡長且
賢宜襲封爵奉祠事狀上政府事未決仁宗親取
孔子譜牒按之曰以嫡應襲封者思晦也復奚疑
特授中議大夫襲封衍聖公月俸百緡加至五百
緡賜四品印泰定三年山東廉訪副使王鵬南言
襲封上公而階止於四品於格弗稱明年升嘉議
大夫至順二年改賜三品印

闕里文獻考元王思誠子思書院學田記鄉之中

庸精舍即沂國公授受故址而為之延祐二年朝廷改為子思書院設山長以司訓導○元潘迪子思書院新廟記中庸精舍大德間宋尹彰擴為書院請額設官朝廷允之許立子思書院置山長一員職視大庠校官

山東通志尼山書院在尼山之麓實毓聖之區也元至順二年衍聖公孔思晦請設尼山書院山長本年以彭璠為山長璠卒以益都路馬猶子為山

長洙泗書院在孔林之東孔子自衛反魯與弟子
講道於洙泗之上魯記所載孔子講堂即此也元
時創建請額至順二年衍聖公孔思晦請設山長
聽衍聖公保族人之賢者任之

闕里文獻考元虞集尼山創建書院記至順三年
衍聖公思晦用林廟管勾蘭實理言請復尼山祠
廟置官師奉祠薦彭璠可用至元二年中書左丞
王公懋德率同列執政者白丞相置尼山書院以

璠為山長

山東通志元世祖中統初詔立曲阜廟學選師儒充教授正錄各一

闕里文獻考元呂思誠加封啟聖王碑世祖龍飛車馬混一自上都大都及天下郡邑立廟學曲阜林廟尤加修崇於是定襲封之嗣除孔氏一人尹曲阜縣

山東通志金元常以衍聖公知縣事故有世襲縣

尹武宗至大二年設曲阜廟學典籍一員仁宗
延祐七年遣說書王存義赴曲阜以太牢祀孔子
是年為聖廟設司樂一員管勾一員

闕里文獻考掌書設自元成宗元貞二年

明

明史儒林列傳洪武元年命孔希學襲封衍聖公
置官屬曰掌書曰典籍曰司樂曰知印曰奏差曰
書寫各一人立孔顏孟三氏教授司教授學錄學

正各一人立尼山洙泗二書院各設山長一人又命其族人希大為曲阜世襲知縣

明史職官志衍聖公孔氏世襲

正二品袍帶誥命朝班一品洪武元

年授孔子五十六代孫希學襲封

其屬掌書典籍司樂知印奏差

書寫各一人

皆以流官充之

曲阜知縣孔氏世職

洪武元年授孔

子裔孫希大為曲阜世襲知縣

翰林院世襲五經博士

正八品

孔氏

二人

正德元年授孔子五十九世孫彥繩主衢州廟祀宋孔端友從高宗南渡家於衢州此孔

氏南宗也正德二年授孔聞禮奉子思廟祀

顏氏一人

景泰三年授顏子五十九世孫

希曾氏一人嘉靖十八年授曾仲氏一人萬曆十

子路裔孟氏一人景泰三年授孟周氏一人景泰

孫仲呂景泰三年授孟程氏二人景泰七年授先儒程頤裔

程顥裔邵氏一人崇禎三年授先儒張氏一人天

二年以先儒張載朱氏二人景泰六年授先儒朱

裔孫文運為博士教授司教授從九學錄學司並末

奉養源廟祀教授司教授從九學錄學司並末

孔顏曾孟四氏各一人又尼山洙泗二書院各學

印洪武元年太祖既以孔希學襲封衍聖公因詔
禮臣曰孔子萬世帝王之師而其後嗣止三品弗
稱褒崇其授希學秩二品賜以銀印

闕里文獻考四氏學學錄宋元祐始置當時尚有
學正一員與學錄同以孔氏充而令教授自署金
元間間用異姓正錄秩皆九品明洪武七年裁學
正止設學錄一員秩未入流宣德元年定以聖裔
任令衍聖公保舉孔氏年德俱尊學問優長者咨

部除授

山東通志聖澤書院孔子宰中都處也明設太常博士一員以主祀事以衍聖公三子承襲

闕里文獻考尼山書院洙泗書院元順帝至正二年初設山長以異姓碩儒任後令衍聖公保舉族人之賢者為之明武宗正德二年改名學錄秩從九品

山東通志唐襄德侯孔德倫在河南寧陵叛建祖

廟明正統九年詔遷廟於儀封嘉靖十四年特授
聖裔為國子學正專主祀事

關里文獻考唐天寶間文宣公避亂遷居寧陵者
數世遂於其地建立聖廟後以子孫流寓寧陵者
主其祀事會河北遷居儀封明正統九年詔即於
儀封立廟嘉靖十四年始置官以孔繼寅為學正
秩正九品令世襲

謹案太常博士及國子監學正二官明史職官

志及儒林傳皆不載

闕里文獻考明劉健重修三氏學記闕里三氏學
洪武始定名為孔顏孟三氏教授司教授學錄各
一員學錄即以孔氏子孫為之○三氏子孫教授
司萬厯年間增入曾氏又改名四氏學○元仁宗
延祐三年衍聖公兼曲阜尹思誠以非嫡罷職專
尹曲阜其子克欽孫希大皆世襲縣尹明洪武七
年希大坐事罷職因改世襲為世職令衍聖公保

舉族人之賢者送部選授領刺赴任○漢魯相乙瑛以孔子廟有禮器無人掌領請置百石卒史一人掌之後世以其管轄灑掃百戶其官遂為百戶又以職司巡徼有武備焉合典籍司樂管勾等三員為兵農禮樂四司始用孔氏後以生員明弘治間始以灑掃戶才德兼優者充之止由衍聖公委用不由部銓注

山東通志山東巡撫方大猷請崇聖賢以培人才

疏行聖公屬官員從明洪武元年設管勾一員司
五屯錢糧司樂一員司樂舞生典籍一員司禮生
書籍掌書一名司文移書寫一名司繕寫知印一
名司印務奏差一名司差遣以上皆由衍聖公保
舉堪用人數咨部銓用

闕里文獻考知印書寫並明洪武二年建隨朝伴
官洪武十七年設

謹案聖裔世爵始自西漢若餘官則後漢始置

百戶卒史然至晉時已廢後魏孝文嘗官孔氏
顏氏而亦未聞世襲也至唐末始以文宣公兼
曲阜令宋時又置廟學教授自是歷代相承遞
有增設更元及明置官漸備然四時將享主邑
耆雖膺上公之封而駿奔者不皆服官之侶至
國朝設六等執事官然後牽牲贊采章綬焜煌先
聖祀典於是有光真足以補前朝之闕典矣至
曲阜世職知縣明隆慶時御史趙可懷已有舉

用非人民受其殃之奏而因循不廢者徒以此
為報先師之盛意而無術以善處之爾今以曲
阜知縣改授世職六品官品秩視舊為崇而無
民社之責為職事之所不及尊師重道之意通
變宜民之術並行不悖斟酌盡善尤為前代之
所不及也

欽定歷代職官表卷六十六